

# Famiglia e scola en il focus

CUN VINCENT AUGUSTIN  
HA DISCURRÌ MARTIN CABALZAR

■ En ses votum introductiv ha il parsura da la Lia Rumantscha punctuà la necessitad dal dialog e da la convivenza per l'existenza dal rumantsch en Grischun. L'accent principal da sia activitad vul la LR metter l'onn proxim sin la famiglia e la scola. La Quotidiana ha vulì savair daplì.

*Nua tschenta la Lia Rumantscha ses accent principal per sia activitad da l'onn proxim?*

Vincent Augustin: L'accent da las activitads da l'onn proxim tschenta la Lia Rumantscha sin la famiglia e sin la scola. Damai che la famiglia è da muntada centrala per il rumantsch da la proxima generaziun vegnin nus a sviluppar differents project e products adattads per las famiglias e per ils uffants. In segund champ impurtant è la scola. La stain nus en il Grischun avant ina revisiun totala da la lescha da scola. Nus vegnin a stuvair interprender grondas stentas per stabilisar e rinforzar la posiziun da l'instrucziun rumantscha en scola. En quest connex vegn la decisiun d'edir en l'avegnir tut ils meds didactics sulet en rumantsch grischun resentida a moda betg mo positiva en tschertas valladas rumantschas. Plinavant sa tracti da francar e definir la posiziun da las scolas bilinguas ed examinar novs models d'immersiun tranter las differents linguas.

## Dialog enstagl protesta

*Sin fundament da las renfatschas che Andreas Wieland ha fatg envers la lingua rumantscha e taliana avais Vos envidà Wieland ad in discurs da podì. Essas Vos satisfatg da questa discussiun e co vai ussa vinavant?*

En ina emprima fasa ha la Lia Rumantscha ditg cler e net che sias expectaziuns negativas davart il rumantschs



Vincent Augustin, il parsura da la Lia Rumantscha.

FOTO M. HARTMANN

sajan inacceptablas ed offendian ils Rumantschs. Da l'autra vart è la LR stada da l'avis ch'i nizzegia nagut da defender questa posiziun, mabain ch'ins sto tschertgar ed anflar il discurs, pertge mo il dialog sa manar a la convivenza che na sa manifestescha betg mo da festas, mabain en la vita da mintga di. Jau persunalmain sun satisfatg dal discurs da podì dad oz. Andreas Wieland ha offrì la pussaivladad da cuntinuar cun ils discurs ed ha envidà la Rumantschia da prender in vista da ses manaschi tar la Hamilton a Panaduz.

*In tema permanent tar las radunanzas da la Lia dals ultims onns è la mancanza virulenta da finanzas. Èsi betg*

*gist uss il mument adattà da pretender daplì meds finanzials da chantun e confederaziun, tant pli che la basa giuridica per in meglier sustegn è uss dada cun la nova lescha da linguas?*

Sin champ chantunal avain nus empruvà avant dus onns da cuntanscher in augment da la contribuziun finanziala a la LR en la debatta dal budget, dentant senza success. Ensemen cun la Pro Grigioni Italiano e la Walservereinigung avain nus alura fatg ina istanza comunabla a la regenza per in augment considerabel da la contribuziun chantunala. La regenza ha bain dà parzialmain suatientscha a questa dumonda, dentant mo parzialmain. Anc adina

pendenta a Berna è l'istanza chantunala inoltrada comunablamain da la regenza, da la LR, PGI ed anr per in augment da la contribuziun federala. A l'ocasiun da sia visita a la Convivenza essan nus sa cunveggnids cun il nov cusseglier federal Didier Burkhalter per ina proxima sentupada en chaussa.

*Nus avain actualmain a Berna ina ministra da finanzas grischuna, en l'antichombra dal cussegl federal sesa la cancelliera federala Corina Casanova ed il Rumantsch Constantin Pitsch en l'uffizi da cultura. Questa contellaziun persunala fiss probabel favuravla per cuntanscher insatge per la Rumantschia?*

Quai è pil mument difficil da predir. L'Uffizi federal da cultura ha promovì ils ultims onns cunzunt il film e main auters projects culturals. Ins ha ussa dentant instradà l'ordinaziun tar la lescha federala da linguas. Là han ins dentant fatg quai che fiss tenor noss giavisch betg propi stà prioritari, numnadain in augment dal servetsch da translaziun per talian en l'administraziun federala e per nus almain positiv la creaziun d'in post da lingua rumantscha tar la chanzlia federala che è vegnì occupà da Rico Valär da Zuoz. Nus sperain d'avair infilà a la festa da la Convivenza buns contacts cun cusseglier federal Didier Burkhalter e pudain constatar ch'el ha gronda simpatia e chapientscha per la convivenza multiculturala en il Grischun. Nus essan optimists ch'i reusseschia a media vista in augment da las contribuziuns actualas.

## In cun l'auter enstagl in sper l'auter

*Las Scuntradas che han gì en ils onns ogtanta e novanta dal tschientaner passà en stadas in success sco scuntradas tranter ils Rumantschs, dentant era purtà als Rumantschs gronda preschientscha en las medias naziunalas. Èn las Scuntradas messas definitivamain ad acta?*

Jau na less betg excluder talas Scuntradas en l'avegnir, dentant forsa en ina altra furma e cun in nov program adattà a la situziun dad oz. Sco opziun resta vinavant en discussiun ina Scuntrada en la Bassa u era qua en il Grischun. Prioritad ha dentant per il mument plitost ina nova festa da convivenza. Las Scuntradas tranter Rumantschas servan plitost al celebrar sasez ed è main drizada al dialog cun las autras culturas. Nossa finamira è in cun l'auter, enstagl in sper l'auter u schizunt in cunter l'auter.